

हिब्रूरालाई परींद्यासिउ चिथी

आव चिथी परमेस्वरए ओपांताव यहूदीरालाई परींद्यासिउ ज़। खाली परींद्याजूयाव मिँए उमिन कान्ल ज़ मारैःए। नो यहूदीर परमेस्वरए ओपाँ चबनै यामाथरैवनी स़ोनो परमेस्वरए उमिनताव दुखर यादैवनी ख्वा ख्वार ओल्द बाव यापैजूयाव (हिब्रू ३:१२; १०:३२-३९)। है जैद आव चिथील परमेस्वरए ओपाँलाई रास्द ओल्द बान्या बनै ओछ्यास ल्यो सरैःसिउ लिजूया (२:१-३; ३:१२-१४)। बुरू युँ सुहुपद थरिद परमेस्वरए उयुँलाव मिताव छैव तान्या खिमो ताके (६:११-१२; १२:१२,१४)। परमेस्वरए गेप्रभु येसु ख्रीसनी साःरो बाचा ओनैवए (८:१-१३; ९:१५), येसु खर्क ज़ माखेमन्या प्रधान पुजारी ताद परमेस्वरस सखैन्या त्याला येन ओदैव ब सरैःसिउ लिजूया (४:१४-५:१०; १३:२०)। भाःकाव कानुननिकाव चलन भरी साचो ओक्याँ माताद छीनीकाव हुन्या पाँए ओसाँ वाज़ ओल्यो (८:५-६; १०:१)। परमेस्वरए साचो ओपाँ ते येसुए ओयेननी ज़ सरैःसिउ लिजूया (३:१-६)।

परमेस्वर गेस ओज़ानी ज़ पाँजूया

1भाःड परमेस्वरए अगमबक्ताराए यायाःनी गेसाखा पुर्खारास घरी पाला ज़ प्राइँ किसिमनी पाँव ज़ उलिजूयाव। 2 आज्याल ते फरी परमेस्वर गेस ओल ओज़ानी ज़ पाँजूया। परमेस्वरए नाम नम ब नो ओज़ानी ज़ जैक्यो, स़ोनो नलाव ताव भरी ब ओज़ाए उकुइत यान्या डादाकिन ज़ थरैद ओनैजूयाव। 3 नाम नम स़ोनो नलाव ताव भरी ओज़ाए ओसक्तीलाव पाँनी वाज़ रहिजूयार। परमेस्वरए अचम्बलाव ओसक्ती स़ोनो ओज़गै ओज़ाए ओक्याँत ज़ रैःजूया। ओगे ब होए ओक्याँत ज़ चबनै सतैसिउ लिजूया। मिँराए यादोव पापए सजा ब ओल ज़ घुर्सिद फोःद ओरायोए स्वर्गत

माहान परमेस्वरए ओवोर्दा चुसिद ले। ⁴ है जैद ख्रीस परमेस्वरए ओचाकर्याराकिन ब घेप्पा ज़ थोरिके। हिताव ज़ नोराकिन घेप्पा मिन ब दैक्यो।

⁵डादा धर्मसास्त्रल ओज़ाए उजूनी इताव सर्सिउ लिज़्या,

“नँ डाज़ा ज़,
आछिम ज़ नँलाई डाजमेंनिके।”

फरी तोथोल,

“डा ओबाबु तान्या डाले,

नो डाज़ा तान्या ले।”

निताव पाँर ओचाकर्यारालाई ते खर्क ज़ है मारादोव। ⁶ परमेस्वरए उसकताव जर्मिउ ओज़ालाई आव मानुवाल उपरीक,

“डाचाकर्या भरिए आवए ओसेवा ओदोरक,”

है लिके। ⁷ परमेस्वरए ओचाकर्यारालाई ते,

“जे डायेन दान्यात कैताक बतास स्यासो जेलिज़्या,

कैताक में: स्यासो जेलिज़्या,”

है वाज़ यादोज़्याव। ⁸ ओज़ाए उजूनी भन्या धर्मसास्त्रल इताव सर्सिउ लिज़्या,

“अ परमेस्वर, नँ नराज़्या खर्क ज़ मान्या खेम्न्या माले।

नराज़्या ब न्यायस ज़ नचलैज़्या।

⁹नयुँ छैव सोनो सोजो येनत वाज़ लिज़्या,

मादान्या येन भरिलाई नसोज़्या।

है जैद नपरमेस्वरए ननैराकिन बनै कुधु ज़ नयुँ होलाँ जैदिक्यो।”

¹⁰फरी तोथोल ओज़ाए उजूनी इताव ब सर्सिउ लिज़्या,

“अ प्रभु, भा:ड आव नाम नँ ज़ नजैके।

सोनो नमलाई ब नँ नकुइए ज़ नजैके।

11 नजैव भरी ते खेमन्या लेर,
खाली नँ ते एकमन्या लिन्या नले।

पुराँदो क्वा उचिसुज्याव मिताव
नजैव भरी ब तछा चिसुन्या ले।

12 नाम नमलाई बर्की माँ:ती रूलून्या नले।

मिँए ओक्वा ओतोजूयाव मिताव
तछा नोनिलाई तोन्या नले।

खाली नँ ते खर्क ज़ तोसिन्या नमाले।

नजुनी ब खर्क ज़ खेमन्या माले।”

13 फरी तोथोल इताव ब लिजूया,

“नसुतुररालाई नखँ धूँल झा:द डामाईवा पै,
डावोर्दा चुसिद लिनके।”

निताव पाँ ओचाकर्यारालाई ते खर्क ज़ है मारादोव। 14 नोर ते
ओयेन दाजूयाव पुरूसर वाज़ ची। नोरालाई परमेस्वरए अजम्बरी
जुनी दैन्या थरैद ओरानैजूयावरालाई सघैन्याए जूनी आदा होदा
यापरीजूयाव।

2

परमेस्वरए ओपाँत धिद लिन्या

1 है जैद गे गेथैजूयाव परमेस्वरए ओपाँत झन ज़ धिद ल्यो
ताके, मानी तँदा बान्या ओछ्यास लिजूया। 2 परमेस्वरए
मिरालाई ओचाकर्यारानी ओरायो कानुन थ०रिउ ओतावए नो
कानुनलाव पाँ मादाद याख्यावनी सजा ब दैकेर। 3 गे झन
प्रभुनिकाव ना:ल्दिउ बाँचैन्या पाँ गेमाभै:किन कातानी ची नो
ओसजानी उस्किउ गेदैरिजूयाव? नो पाँ ड़ादा गेप्रभुए ओल
ज़ ओरासथैजूयाव। हा:किन गे फरी नो पाँ भरी ओलसकाव
लिजूयावराए ल्योनी गेदैके। 4 परमेस्वरए फरी नोराए यापाँ

थरैद्यान्याए जूनी अचम्बलाव ओयेनर दाव परींद ओसरेसर सतैंद याएक्यो। सोनो छैव पुरूसनिकाव बरदानर ब ओल ओपैङ्याव मितावनी भाःद याएक्यो।

परमेस्वरए ओराज्या ओजाए उकुइत याद नैव

5गे नो हुरिङ्या है गेलिङ्याव परमेस्वरए ओराज्या ओल ओचाकर्याराए याकुइत ते नैद मारायो। 6 धर्मसास्त्रल ब तोबोए अइ लिद सर्द नैव,

“अ परमेस्वर,

मिं काता ची उलिङ्यावदा?

मिंलाई काराव नमामेंःधुङ्याव?

नोलाई काराव नचेतैङ्याव?

7नं जाँवा पै नमताव नचाकर्याराकिन मिंलाई जिम्जा नजैके।

फरी नो मिंलाई ज सघ्योःद बनै ओमान ल्यो नजैके।

8ताव भरी ब होए उधूल ज जैद नएके।”

परमेस्वरए नो मिंलाई प्राई उकुइत ओयोए ओल उधूल माल्यो काता ज माले। खाली गे ज गेसैङ्या, नाम नमलाव तावर मिंराए धूल मातातावर कुधु ज लिङ्यार। 9 नो धर्मसास्त्रलाव पाँ भरी येसुए ओक्याँत वाज थरिउ लिङ्या। आव मानुवाताव मिंराए जूनी परमेस्वरए उयुँ ओनावए नो सिन्याक पै सजिमसिद हुके। परमेस्वरए ओचाकर्याराकिन जाँवा पै सजिमसिउ नो ज लिङ्या। मिंराए जूनी उजिउ झाःद ओरायोनी परमेस्वरए सघ्योःद बनै ओमान ल्यो ओजैव ब नोलाई ज।

परमेस्वरए ओजा मिं ज मिन्सिके

10ताव भरी ओल उजूनी ओल ज जैङ्याव परमेस्वरए गे मिंरालाई ओजार जैद ओजगैल रैन्या पैक्यो। है जैद गे प्राइलाई बाँचैन्याए जूनी ओजा येसुलाई मिंराए यादैङ्याव मिताव दुखर सहिउ परीन्या

जूयासो लिज्या लिन्या थरैक्यो। ¹¹ गेलाई परमेस्वरए उयुंलाव मिताव छैवर जैद ओबाबुस सखैजूयाव येसुस तोबोए ओथोर ज़ गेताजूया। है जैद गेलाई 'डाभाइर' है दान्या ओलाज माहुइ। ¹² नोए उजूनी धर्मसास्त्रल इताव सर्सिउ लिजूया,

“अ परमेस्वर, डा डाभाइरालाई नमिन सथैन्या डाले।

नोराए याखार्ल नमिन सघ्योःद्यान्या गितर गैन्या डाले।”

¹³फरी तोथोल,

“डा परमेस्वरए ओक्याँत ख्यासिद लिन्या डाले”

सोनो,

“परमेस्वरए डापासल झाःद ओयाँव ओज़ारास ज़ डालिजूया।”

¹⁴परमेस्वरए ओज़ार मिँर तान्या ओतावए ओल ओज़ा येसु मनी नोराए जूनी मिँ ज़ मिन्सिद सिके। नितावनी ज़ सिन्या सजाल झाःजूयाव सैतानए ओहक ख्यादिक्यो। ¹⁵ सोनो, सिन्या ताया लिद छेःद याजिउ भरी दुखस लिजूयावरालाई ब यापलेक्यो।

¹⁶येसु परमेस्वरए ओचाकर्यारालाई माःक, अब्राहामए ओथोरालाई सघैना उहुव ची। ¹⁷ है जैद उयुँ याल्द गे मिँराए गोपापए सजा फोःद्याद परमेस्वरस सखैन्याए जूनी प्रधान पुजारी जैसिद गेजूनी परमेस्वरस पाँद्यान्याए जूनी ओल येसु प्राइँल ज़ गे मिँ स्यासो ताव ज़ उपरिजूयाव। ¹⁸ ओल ब प्राइँ दुखर दार्द जाँचिसिद उथोरिउनी वाज़ गे मिँरालाई गेयुँए बलेःद माचावल ओपारैसिजूयाव भरिल जोगोइव धुव।

3

येसु मोसाकिन घेप्पा ज़

¹है जैद परमेस्वरए उमिनताव खुल्सिउ गेनै गेमैर, परमेस्वरए परींद ओयासिउ प्रधान पुजारी येसुलाई चिऊव ताके। ² किताव मोसाए उजिउ भरी परमेस्वरए उझिमल सतस ओदोव, हिताव ज़ येसुए

ब परमेस्वरए दोव उपरींव येनलाई सतस ज़ दाद सयोःक्यो।
 3 किताव जैसिउ झिमकिन जैज़्याव मिं घेप्पा ताज़्या, हिताव ज़ मोसाकिन येसुए उमिन घेप्पाल गनिसिउ लिज़्या। 4 तोबोमा तोबोए ते झिम जैज़्याव। हैदी ब प्राइँ जैज़्याव ते परमेस्वर ज़। 5 मोसाए परमेस्वरए उझिमलाव येन सतस ओदोदी ब होए ओयेन नोकोर येन वाज़ ओल्यो। होए ओपाँज़्याव ओदोज़्याव भरी ब जाँकोसै छीनीकाव तान्या पाँए ओसाची वाज़ ओल्यो। 6 स्त्रीस ते ओबाबु परमेस्वरए ओबताहा दैन्या झिमए ओर्गे मिताव ज़ लिज़्या। गे मनी होए उझिमलावर ज़ गेलिज़्या। खाली गेयुँ गेसुहुबोलाई मारासुद आस दाद गेनैज़्याव ओमायोःवा पै थ०रिद गेलिकिन वाज़ गेताज़्या।

ओज़ाए ओपाँ गेमाभैःकिन ओछ्यास लिज़्या

7है जैद छैव पुरूसए ओपाँव पाँ आव ज़,

“आछिम परमेस्वरए ओपाँ जेथैकिन,

8जेजिज्यु बाज्युर बनल परमेस्वरकिन तँदा याजैसिउ मिताव,
 जे जेयुँ खाव ताजैच्यो।

9हो बेलाक चालीस बर्स पै अचम्ब अचम्बलाव डायेनर
 यारैःज़्यावत ब
 डानाल केःद्याँकिर।

10है जैद डा नोरास डारिस चोद अइ ब डालिके,

‘आवराए यायुँ ते एकतार तँदा वाज़ लिज़्या।

डाल्योदा हुन्या युँ दो ज़ मादोर।’

11है जैद डारिसए इताव किर्या ब डाइःके,

‘स० होलाँ तान्या पोल खर्क ज़ केसो दैन्या मालेर।’”

12है जैद गेनै गेमेँर, जोगोइसिद लिच्यो, मानी जेनी ख्वा ख्वार
 जेयुँ माहुपद जेयुँए बलेद जीदो परमेस्वरए ल्योनी पुलुसुद बान्या
 ओछ्यास लिज़्या। 13 बेला उलिज़्याक ज़ जे जेल सुए जेयुँ

ब पापए झुकैद बलेसो ताताक लिद एकमून्या ज़ अर्थेसिच्यो।
 14 गेयुँ हुपुद गेथूसिउलाई मारासुद छींड पै थंरिद गेलिकिन
 परमेस्वरए ओराज्यालाव बताहा ख्रीसस सिप ज़ दैन्या गेले। 15 नो
 धर्मसास्त्रलाव है लिसिउ पाँ तामें:च्यो। नो पाँ आव ज़,
 “आछिम परमेस्वरए ओपाँ जेथैकिन,
 जेजिज्यु बाज्युर परमेस्वरकिन तँदा याजैसिउ मिताव,
 जे जेयुँ खाव ताजैच्यो।”

16नो ड़ादा परमेस्वरए ओपाँ थैद मनी ओलकिन तँदा जैसिज्यावर
 मोसाए इजिप देसनी ओरापले:वर ज़। 17 नो चालीस बर्स भरिलाव
 परमेस्वरए उरिस चोवर ब नोर ज़। है जैद यादोव पापए चालीस
 बर्स भरिल नो बनल ज़ सोतोर्यान ताकेर। 18 ‘नो स० होलाँ दाव
 पोड बाव दैन्या जेमाले’ है ओरादोव ब नो ओपाँ मादोज्यावरलाई
 ज़। 19 है जैद ननी ज़ गेसैज्या, ओललाई यायुँ ओमाहुबोए चाव पोल
 बाव मादैकेर।

4

परमेस्वरए ल्योदा बान्या मौका छुपिन्या

1 है जैद जोगोइसिद ल्यो ताके, नो स० होलाँ तान्या पोल पसिन्या
 मौका गेलाई परमेस्वरए याद नैसिउ। नो मौका छुपिउ ताके, मानी
 गे ब पसिधुन्या गेमाले। 2 मोसाए ओपालाकाव मिँराए परमेस्वरए
 ओपाँ याथैव मिताव गे ब थैव ज़ गेनैज्या। खाली नोराए ओपाँ
 थैद ब यायुँ ओमाहुबोए नो पाँ नोरालाई अनाकलाव ज़ ताके।
 3 ओललाई यायुँ हुबोर वाज़ नो स० होलाँ तान्या पोल पसिज्यार।
 यायुँ माहुबोराए जूनी ते ओल परमेस्वरए ज़ है लिद ले,
 “डारिसए इताव किर्या ब डाझा:के,
 ‘स० होलाँ तान्या पोल खर्क ज़ केसो दैन्या मालेर।’”

हैदी ब गे मिरालाई तोबो स० होलाँ तान्या पो नाम नमलाव ओयेन ओखेमो छचामकिन ज़ उलिज़्याव। 4 धर्मसास्त्रल ब न्नासिन्या छचामए जूनी तोथोल अइ लिद सर्सिउ लिज़्या,
 “परमेस्वरए नाम नमलाव ओयेन भरी ओखेमोत सात दिनलाव छचाम न्नासिके।”

5खाली डादाडाव है गेलिज़्याव मिताव धर्मसास्त्रल इताव सर्सिउ लिज़्या, “स० होलाँ तान्या पोल खर्क ज़ केसो दैन्या मालेर।”

6हैदी ब नो पोल पसिन्यार लिज़्यार ज़। खाली नो भाःकाव मिराए ओपाँ थैद ब यामादोवए पसिउ मादैकेर। 7 है जैद नोराकिन कुधु छींड परमेस्वरए दाऊद राजाए ओयाःनी गेलाई ब तोबो मौका जैघासिक्यो। नोए ओपाँ आव ज़,
 “आछिम परमेस्वरए ओपाँ जेथैकिन,
 जे जेयुँ खाव ताजैच्यो।”

8यहोसूए इस्राएलीरालाई परमेस्वरए याका ओरायो देसल ओरासकेस्क नो स० होलाँ तान्या पोल पसिन्या मौका भरी ओखेमो ताकिन परमेस्वरए छीनी गेलाई निताव पाँ है दान्या ओमाल्यो। 9 है जैद परमेस्वरए उमीं ताज़्याव भरिरालाई स० होलाँ तान्या पो नैसिउ ज़ लिज़्या। 10 जो मिं नो पोल केसज़्या, किताव परमेस्वरए ओयेन भरी खेम्द ओन्नासिउ, हिताव ज़ नो मिं ब ओयेनरानी ओर्सार नैज़्याव। 11 है जैद गे नो स० होलाँ तान्या पोल बान्यादा युँ थू जैव ताके। डादाडाव ओपाँ मादोज़्यावर यामापसिधुज़्याव मिताव ताताक।

12परमेस्वरए ओपाँ बनै ओसक्ती ल्यो सोनो येन दावका दाव ज़ लिज़्या। नो पाँ आनी हुनी ओधार ल्यो तरवालीकिन ब छाव ओतावए मिंए युँल पसिद क्य़ाँ भरिल सरालिसिद युँलाव पाँ सोनो

बुद्धी भरी ब सरसाप खिम्द जाँचिज्याव। 13 सोनो परमेस्वरए ओराजैव भरिल ओल ओमारैःव मोसिउ काता ज़ माले। परमेस्वरए ओड़ाक प्राइँज़ फैसिउ लिज्या। गेयेन भरी ब तछा ओललाई है दाव ज़ परिज्या।

प्रधान पुजारी येसु

14 है जैद परमेस्वरए ओज़ा प्राइँरानी घेप्पा गेप्रधान पुजारी येसु आव नामनी गेजूनी स्वर्गत परमेस्वरए ओड़ाक ओबावए नो गेयुँ हुबो पाँलाई मारासुद ज़ थरिद ल्यो ताके। 15 गे गेप्रधान पुजारीए गेदुखर रँःद उयुँ ओमानाज्याव ते माःक। ओल ब गे गेदैज्याव मिताव दुखरानी जाँचिसिके। खाली ओजाँचिसिदी ब पाप ते मादोव। 16 हो मिताव ज़ गे ब उयुँ य़ालो परमेस्वरए ल्योक माछेःद ज़ बाव ताके। हो ताकिन ची डादाडाव गेबलेःव येनर ब उयुँ नाद रासून्या ले। फरी खाँचो ओताव बेलाक ब सघैन्या ले।

5

येसु कानुननिकाव पुजारी स्यासो

1 प्रधान पुजारीर ब परमेस्वरए ओड़ाक मिँराए खानी त्याला येन दान्यात खतैसिउर ताज्यार। नोराए मिँराए यादोव पापए जूनी पुजार दाद्याद परमेस्वरस यारासखैज्यार। 2 मिँनिकाव पुजारीराए मिँराए यादैज्याव दुखर या ब यादैवए, छुत बिरैज्याव मिँलाई परमेस्वरस सखैन्या खोरोनी माःक, चावनी ज़ दोज्यार। 3 है जैद नो पुजारीराए छुत मिँराए जूनी परमेस्वरस सखैन्या पुजा यादोक या याजूनी ब दाव ज़ परिके।

4 फरी नोर यानी प्रधान पुजारी याजैसिउ ते माःक। किताव हारूनए उसकताव पुजारी येन परमेस्वरनी ओदैव, हिताव ज़ पुजारी येन दैव भरिए परमेस्वरनी ज़ दैहुकेर। 5 हिताव ज़ ख्रीस ब प्रधान पुजारी ओलनी सघ्योःसिद ओताव ते माःक। नोलाई,

“नँ डाज़ा ज़,
 आछिम ज़ नँलाई डाजमैनिके,”
 है दाज़याव परमेस्वरए ज़ जैक्यो। 6 फरी होए उजूनी तोथोल अइ
 लिद ब सर्सिउ लिज़या,
 “नँ मल्कीसेदेकए ओदैव मिताव पुजारी येन नदैरिज़या।
 नँ खर्क ज़ माखेमन्या पुजारी नतारिज़या।”
 7 येसु ख्रीस मानुवात उलिज़याव बेलाक ओललाई सिउनी
 जागैधुज़याव परमेस्वरलाई उयुर स्यासे सतेद धो थाइव ताद घरे
 घरे पोंखारिक्यो। उजिउ भरी परमेस्वरए उयुंलाव मिताव भरी
 सयोऽद ओयोए परमेस्वरए ओपाँ भरी थैदिक्यो। 8 येसु परमेस्वरए
 ओज़ा ओतादी ब ओल ब उसहिउ दुखरानी ज़ परमेस्वरए उयुंलाव
 मिताव येनर माबिरैद ज़ दान्या सिऊसिके। 9 हो भरिल प्राइनी
 उथरिउए परमेस्वरए गो ओपाँत बाज़याव भरिरालाई अजम्बरी
 जुनी दैन्या ओज़ा येसुनी ज़ जैद्यासिक्यो। 10 मल्कीसेदेकए
 ओदोज़याव मिताव येन दान्याए जूनी परमेस्वरए नोलाई प्रधान
 पुजारी ब जैद्यासिक्यो।

आःपै थालनलाव पाँत जेलिज़या

11 नोए उजूनी जेलाई है दान्या पाँर कुधु ज़ लिज़या। खाली जे चावस
 थैन्या युँ जेमादोवए नो भरी जेलाई धो पलासो ताज़या। 12 आः
 झरी जे ते छुतरालाई पैन्याकावर ताव परिन्या। कै जैद जेलाई झन
 आःपै परमेस्वरए ओपाँताव ओथालन पैन्या मिँर ओचाहिज़याव?
 जे आःपै नुइँ ओन्या भाउज़ा स्यासोर ज़ जेलिज़या। जे ज़याव
 ज़यान्या स्यासोर खर्क तान्या? 13 नुइँए ओडाज़याव मिँ ते धर्मलाव
 पाँ चावस माथरैधुज़याव भाउज़ा स्यासो ज़ लिज़या। 14 तनो ज़याव
 ते परमेस्वरए ओपाँत ओगहक ल्योलाई ज़। नोए ओक्याँत परिउ
 भरित परमेस्वरए ओपाँदा उयुँ थू जैद पाखो ओतावए ओल दान्या

मादान्या येन छुतैज्याव ।

6

थालनलाव पाँराकिन डाकसै बान्या

1है जैद गे स्त्रीसए ओपाँताव ओथालनलाव पाँराकिन जाँ डाकसै बाद पाखो ताव ताके । नो थालनलाव पाँर आवर ज़ — सिन्या सजादा लाँज़्याव येनलाई रासद परमेस्वरलाई युँ सुहुपन्या, 2 सछैँसिन्या, सुवाराए क्यॉत कुइ नैद पोखारिन्या, सिउनी सोवत ख्वाराए खर्क ज़ माखेमन्या सजा दैन्या, ख्वाराए अजम्बरी जुनी दैन्या । 3 परमेस्वरए ओसघैसिकिन नो पाँराकिन जाँ डादा बान्या गेले ।

4डादा परमेस्वरए ओपाँत तखेप बनै सैन्या ताव मिँ स्वर्गताव असिकर सोनो छैँव पुरूस ब दैद, 5 उयुँल परमेस्वरए ओपाँ चाव ज़ ओल्यो लिन्या थरैद परमेस्वरए ओराज्यालाव अचम्बलाव सक्तीर ओदादी ब, 6 छीनी नो मिँ परमेस्वरए ओपाँलाई सोद ओरास्किन नो मिँलाई फरी सोवोल्द मारैसिधुइ । नो मिँए फरी ब परमेस्वरए ओज़ालाई क्रुसत तङ्गैद बीज्यात ओजैव मिताव ज़ लिज्या ।

7हिताव ज़ ँँःए ब परमेस्वरए ओसवाज्याव री दैद नलाव येन दाज्यावलाई चाव चाव सैर सपरीद ओएकिन नो ँँः परमेस्वरए ओअसिक धूँल उलिज्याव मिताव ज़ लिज्या । 8 खाली नो ँँःए जुर रमर ओसपरीकिन नो ँँः काम मालागिउ ताद परमेस्वरए ओसराप धूँलाव मिताव ज़ लिज्या । निताव ँँः मेंःए ओज्यास वाज़ ताज्या ।

जेथूसिउ येनत मातेन्सिद कलँ ल्यो ताके

9अ गेयुँलाव गेनेँ गेमेँर, जेलाई इताव ख्योःन्या मिताव पाँर है गेदाचिदी ब, जे अजम्बरी जुनी दैन्यावाकावर ताद जेलिज्याव मिताव गेडम्सिज्या । 10 जे डादाकिन ज़ परमेस्वरए उमिनत

लिज्यावरालाई जेरासमारिहुज्यावए परमेस्वरए ल्योदा जेयुं थू जैद जेनेज्याव ननी ज़रैःज्या। परमेस्वर अन्याय मादान्या ओतावए नो जेयेनलाई मामेंःव। 11 जेल्योदा गेयुं इताव लिज्या, ‘नो जेआसलाई फिस्को मातान्या जैन्याए जूनी नो येनत छींङ पै ब कलँ लिद जेलिकिन ताखेहो’ है गेलिज्या। 12 है जैद जे मातेनसिद किताव भाःकाव मिँराए परमेस्वरए ल्योदा यायुं हुपूद थंरिद यादोवनी परमेस्वरए ओरायो याकालाव पाँर दैकेर, जे ब हिताव ज़ दोव ताके।

परमेस्वरए ओपाँ बनै थंरिउ लिज्या

13परमेस्वरए अब्राहामलाई याका ओएक ओलकिन घेपूपा छुन्या ओमादैवए ओल उमिननी ज़ अइ लिद किर्या झाःक्यो, 14 “आछिमकिन नँलाई बनै घ्योःव असिक डाईरिज्या, नथोर बनै सबाद डाईरिज्या,” है दोक्यो। 15 हुनी ज़ परमेस्वरनी ओदैव याकालाई कुधु बर्स पै कींद बल्ल दैक्यो।

16मिँराए ते याकिन घेपूपालाई छुद किर्या झाःज्यार। किर्यानी वाज़ यापाँ थंरिद ‘आव ताखेहो, हो ताखेहो’ लिन्या पाँ भरी ब खेमज्या। 17 हो मिताव ज़ परमेस्वरए ब, “डा डापाँ खर्क ज़ मातोसिउ थंरिउ लिज्या,” लिद छींनीकाव ओयाका दैवरालाई सतैद्यान्याए जूनी अब्राहामलाई किर्या झाःदिक्यो। 18 नो खर्क ज़ मातोसिज्याव ओपाँ अब्राहामए ओक्याँत नेथोनी ज़ रैःके। डादा ओयो याकानी रैःके, छींनी ओझाःव किर्यानी ब रैःके। है जैद गे आज्यालकाव मिँराए ब परमेस्वरए ओपाँ फिस्को ओमाताज्याव ओल्यो लिद परमेस्वरए ओयासिरिज्याव बरदान दैन्याए जूनी येसुए ओक्याँत ख्यासिद लिन्यात गेयुं झेंःव ज़ लिज्या। 19-20 नो ओक्याँत ख्यासिद गेलिज्याव येसु बनै थंरिउ काताए ब मापलूतैधुन्या पहर स्यासो लिज्या। होत ज़ गेलिकिन गे

ब ग्याल गिल ज़ तान्या गेमाले। नोए ज़ मल्कीसेदेक मिताव खर्क ज़ माखेमन्या प्रधान पुजारी ताद प्राइरानी चोखो पोल लिज़्याव परमेस्वरए ओड़ाक बाद गेलाई ब बान्या येम फैद्यासिक्यो।

7

पुजारी मल्कीसेदेक

1आव मल्कीसेदेक सालेम सहरलाव राजा ओल्यो, माहान परमेस्वरए उपुजारी ब ओल्यो। हो बेलाक अब्राहामए राजारालाई हारैद उहुज़्याक मल्कीसेदेकस निदैसिक मल्कीसेदेकनी असिक दैक्यो। 2 अब्राहामए नैद ओरारैव भरिनी दस भा जैद तभा मल्कीसेदेकलाई एक्यो। मल्कीसेदेकए ओअर्थ 'सतस दाज़्याव राजा'। ओराज़्या सालेमए ओअर्थ फरी 'सनच' ज़। 3 होए उज़्नीकाव सर्सिउ भरिल कान्ल ज़ ओबाबु ओआमा, ओसाखा पुर्खा सोनो उजर्मिउ, उसिउ छ्याम ब मारैःए। इतावनी ज़ नो परमेस्वरए ओज़ा मिताव खर्क ज़ माखेमन्या परमेस्वरए ओड़ाकाव पुजारी येन ओदोज़्याव रैःज़्या।

मल्कीसेदेक प्राइनी ज़ घेप्पा रैःज़्या

4आव ब सैच्यो, गेपुर्खा अब्राहामए नैद ओरारैवनी दस भा जैद तभा भरी नोलाई ज़ एक्यो। ननी ज़ मल्कीसेदेक घेप्पा रैःज़्या। 5 कुधु छींड अब्राहामए ओथोलाव लेबी थरलाव पुजारीरालाई उपुर्काव यादाज़्यु भाइराए, प्राइँ ज़ तोबोए ओथोर यातादी ब, मोसाए ओकानुननी दस भानी तभा पुजारीरालाई याव ज़ उपरिज़्याव। 6 खाली मल्कीसेदेक ते लेबी थरलाव माःक। हैदी ब अब्राहामए ल्योनी मल्कीसेदेकए दस भानी तभा दैक्यो। नो मल्कीसेदेकए परमेस्वरए ओय़ाका दैव मिँलाई ज़ असिक एक्यो। 7 गे ब गेसैज़्या, असिक दैज़्यावकिन असिक याज़्याव मिँ घेप्पा ताज़्या।

8फरी, नो लेबी थरलाव पुजारीराकिन ब मल्कीसेदेक घेप्पा ज़ रैं:ज़्या। नोर सिउ ज़ लिज़्यार, मल्कीसेदेक ते उसिउ मारैं:ए। 9 ख्वाराए अइ ब ल्यो धुर, दस भानी तभा दैव परिन्या लेबीराए ज़ अब्राहामनी मल्कीसेदेकलाई दस भानी तभा एकेर, 10 काराव ल्यो ताकिन अब्राहाम सोनो मल्कीसेदेकनी निदैसिक लेबी थरलाव पुजारीर यापुर्खा अब्राहामए ओक्याँत याल्यो।

येसु मल्कीसेदेक मिताव ज़

11नो कानुननिकाव लेबी थरलाव पुजारीराए यादोव येननी गे मिराए जूनी परमेस्वरए ओयेन भरी उतुपैव ताकिन काताए जूनी धर्मसास्त्रल छुत किसिमलाव पुजारी तारिज़्या है उलिरिज़्याव? हारूनए ओथरनी मातान्या ओतावए परमेस्वरए डादाकिन ज़ मल्कीसेदेकए ओयेन मितावनी तान्या थरैक्यो। 12 नो कानुननिकाव पुजारी येन सा:रोनी तान्या ओतावए नो कानुन ब सा:रो ज़ ताव परिके। 13 नो है गेलिज़्याव मिँ ते पुजारी थरलाव मा:क लिन्या प्राइँए ज़ गेसैज़्या। होए ओथरल पुजारी येन दावर ब सु ज़ मालेर। 14 नो मिँ गेप्रभु ज़। ओथर ते यहूदा थर ची। यहूदा थरलावरलाई मोसाए पुजारी येन ते हैज़ मारादोव।

15येसु उहुवत प्राइँनी ज़ मल्कीसेदेक मिताव ओरैं:वए नो कानुननिकाव येन इन ज़ उतुपिउ रैं:के। 16 येसु पुजारी थरलाव कानुननी पुजारी ओताव मा:क। खर्क ज़ मासिन्या जुनी ओदैवनी ओताव ची। 17 किताव धर्मसास्त्रल सर्सिउ उलिज़्याव, हिताव ज़ ताके। नलाव सर्सिउ आव ज़, “नँ मल्कीसेदेकए ओदैव मिताव पुजारी येन नदैरिज़्या।

नँ खर्क ज़ माखेम्न्या पुजारी नतारिज़्या।”

18नो डादाडाव कानुनए काता ज़ माजैधुन्या अनाकलाव ओतावए नो कानुन ख्यासिके। 19 काराव ल्यो ताकिन कानुनए सुलाई ज़

परमेस्वरए उयुंलाव मिताव माराजैधुक्यो। है जैद होए ओपोल होकिन चाव आस याद नैसिउ। ननी ज़ गे परमेस्वरए ल्योड गेकेसज़्या।

येसुए पुजारी येन किर्यानी ज़ दैक्यो

20येसुए परमेस्वरए ल्योनिकाव पुजारी येन किर्यानी ज़ दैक्यो।
21 नो कानुननिकाव पुजारीराए ते किर्यानी यादैव माःक। येसुए किर्यानिकाव ओदैव पुजारी येन ते धर्मसास्त्रल ब इतावनी सर्सिउ लिज़्या,

“डा परमेस्वरए किर्या झाःद डानै,

डायुं ब खर्क ज़ डामातोए,

“नँ खर्क ज़ माखेम्न्या पुजारी नतारिज़्या।”

22है जैद नो परमेस्वरए ओझाःव किर्यानी नो कानुननिकाव बाचाकिन येसुनी ओयासिउ बाचा बनै चाव सतैसिउ लिज़्या।

येसु खर्क ज़ मातोसिए

23नो कानुननिकाव पुजारीर यायेनत अजम्बरी मातार। यासिउनी यासिउनी यातोसिज़्याव। 24 गेत्याला येसु ते खर्क ज़ मासिन्या ओतावए ओयेन ब खर्क ज़ माखेमे। 25 है जैद येसुए परमेस्वरए ओड़ाक एकतार ज़ पोंखारिद ओयासिज़्यावए ओल ओल्योनी परमेस्वरए ल्योक बाज़्यावरालाई एकम्न्याकावए जूनी बाँचैसिज़्याव।

येसु ओखत माल्यो ज़ लिज़्या

26गेलाई निताव प्रधान पुजारी ज़ बनै ओचाहित ल्यो लिज़्या। नो बनै छैव, सोजो, ओखत माल्यो, पापीराए ल्योनी पुलुसूद, स्वर्गत बाद प्राइरानी ओमान ल्यो पोल चुसिद ले। 27 नोए ते डादाकिनकाव प्रधान पुजारीराए मिताव दिनकाव पुजार दाव मापरिए। डादाडाव प्रधान पुजारीराए ते उसंकत या यापापए जूनी, हुकिन मिँराए

यापापए जूनी पुजा यादोज्ञयाव। ओल येसुए ते उजिउ ज़ चरैःद पुजा भरी तखेपूत ज़ खेमूक्यो। ²⁸ कानुननिकाव खतैसिउ प्रधान पुजारीर नो कानुन यामासयो-धुवए याखत ल्योर ताकेर। खाली कानुनकिन छीनी परमेस्वरए उकिर्यानिकाव ताव प्रधान पुजारी ते परमेस्वरए एकमन्याकावए जूनी ओखत माल्यो ओथरैव ओजा ज़।

8

साःरो बाचानिकाव प्रधान पुजारी

¹आव है गेदाचिज्ञयावए ओअर्थ आव ज़, गे गेप्रधान पुजारी येसु स्वर्गत बाद माहान परमेस्वरए उसिंहासनए ओवोर्दा चुसिद ले। ² नल परमेस्वरए ओडाकाव चोखो पोल गेलाई परमेस्वरस सखैन्याए जूनी ओयेन दाव ज़ नैज्ञयाव। नो चोखो पो मिँए जैसिउ मिताव माःक, आव ते परमेस्वरए ओजैव साचो पो ज़।

³कानुननिकाव प्रधान पुजारीर मिँराए परमेस्वरस खैन्या यादोव पुजा चरैःद्यान्याए जूनी खतैसिउर यालिज्ञयाव। है जैद गेप्रधान पुजारीए ब गेजूनी कातार चरैःद्याव ज़ परिके। ⁴ खाली गेप्रधान पुजारी आःपै आव मानुवात ओल्यो ताकिन निताव पुजारी येन मादैखेहो। निताव येन दैन्यार ते कानुननिकाव पुजारीर ज़ लिज्ञ्यार। ⁵ नोराए यायेन स्वर्गत छीनीकाव तान्याए ओसाँ सतैसिउ मिताव वाज़ लिज्ञ्या। काराव ल्यो ताकिन मोसाए नो चोखो पाल जैव ओपैज्ञयाक परमेस्वरए है दोक्यो,

“नो पाल नजैक खागरताव सतैद डाईव गोइँनी वाज़ जैयो।”

⁶खाली डादाकिनकाव पुजारीराए यादैव येनकिन येसुए ओदैव येन घेप्पा लिज्ञ्या। नोए ओयेन कातानी ओघ्योःव लिक ते, परमेस्वरए मोसालाई ओयो याकाराकिन येसुए ल्योनी ओयासिउ याका घेप्पा ओतावए येसुए मिँर सोनो परमेस्वरसकाव याखालाव ओसखैज्ञयाव बाचा घेप्पा लिज्ञ्या।

7नो मोसानी परमेस्वरए मिँरालाई उस०कताव ओरायो बाचा नत ज़ उतुपैव ताकिन छुत जैन्या ओमेला ज़ मालिखेहो। 8 खाली परमेस्वरए नो उमींरालाई याखत ल्योर थरैद अइ लिद पाँके, “छींनी तछा इस्राएल सोनो यहूदा कुललाव डामींरास साःरो बाचा डानैरिज़्या।

9नो बाचा यासाखा पुर्खारसकाव डानैव मिताव ते तान्या माले। हो बेलाक डामींरालाई इजिपनी याकुइनी दौरैद पलेन्द, बाचा डाराएके।

खाली नोर डाबाचाल यामाल्योए डामाराचिऊके।

10छींनी तछा इस्राएलीरास इताव साःरो बाचा डानैरिज़्या, डाकानुन यायुँल झाःद्याद, डापाँर यायुँल सर्द डाराएरिज़्या। हुनी ज़ डा यापरमेस्वर तान्या डाले, या डामींर तान्या लेर।

11हो बेलाक छुतलाई डापाँ पैव परिन्या ब तान्या माले, ओभाइलाई, ‘परमेस्वर सरेस्के’ है दाव ब परिन्या माले।

काराव ल्यो ताकिन घेपूपा ज़िमज़ाराए प्राईँए डालाई सरेसून्या लेर।

12नोरालाई डायुँ नाद यादोव पापर रासद्याद फरी य़ाका ज़ दान्या डामाले।”

13नो सर्सिउल परमेस्वरए “साःरो बाचा डानैरिज़्या” है ओल्योए ड़ादाडाव बाचा भरी पुराँदो थरैक्यो। है जैद पुराँदोए ओपोल साःरो ओताव प्राईँना पुराँदो भरी माके।

9

पुराँदो चलननी परमेस्वरए ओसेवा दान्या पो

1ड़ादाडाव चलनल परमेस्वरए ओसेवा दान्या कानुनर ब यालिज़्याव, ओसेवा दान्या पो ब जैसिउ उलिज़्याव। 2 नो पो, पालल नेखन्द जैसिउ ओताज़्याव। ड़ाताव खन्दल दिउ बालून्या सोनो चोखो भरेस नैन्या तेबल नैसिउ उलिज़्याव। नो ड़ाताव

खन्दए उमिन 'चोखो पो' है यादोज्ञयाव। 3 नो पाल जीलाव तोबो बारिसिउ क्वाकिन उछीनीकाव खन्दए उमिन 'प्राइरानी चोखो पो' है यादोज्ञयाव। 4 नल सुनए मुरिसिउ धुप झाःन्या थान सोनो सुनए मुरिसिउ मुधुस ब यानैज्ञयाव। नो मुधुसल हारूनए पलिउ उझुइ, लुँ फल्यात सर्सिउ कानुन, सोनो तोबो सुनए जा ब यानैज्ञयाव। नो जाल फरी मन्न ब यानैज्ञयाव। 5 नो मुधुसए ओकत परमेस्वरए जगै मगैव ओचाकर्यानी निकर निकर जौरैद जैसिउ उलिज्ञयाव। नोनी निकरए परमेस्वरए उमीरालाई यापापनी ओरारासूज्ञयाव पो थोर्सिउ उलिज्ञयाव। आव पाँ भरी ओलेखा ल्यो ज्ञ लिज्ञया, खाली तोबो तोबोनी आख है मालिसिधुइ।

पुराँदो चलन साःरो ओमाहुवा पै वाज्र

6नो सेवा दान्या पो प्राइँ ओतावत, पुजारीर दिनकाव ज्ञ डाताव खन्दल पसिद परमेस्वरए ओसेवा यादोज्ञयाव। 7 नो बारिसिउ क्वाए उछीनीकाव खन्दल प्रधान पुजारी वाज्र सालकाव तखेप उपसिज्ञयाव। खाली बिनु झी माःक, झी लाँद वाज्र ओबाज्ञयाव। नो झी ओल सोनो मिँराए मासैदकाव यादोव पापए जूनी ओचरैःज्ञयाव। 8 आव भरिनी परमेस्वरए उपुरूसए, नो पाललाव येन ओलेवा भरी परमेस्वरए ओझाकाव प्राइँरानी चोखो पोल बान्या येम आःपै माफैसिताव लिज्ञया लिन्या सतैद ओराएज्ञयाव। 9 नो सतैसिउ भरी आज्याल मनी खैज्ञया। नो भरिए ओअर्थ आव ज्ञ, परमेस्वरलाई पुजा दाद याचरैःज्ञयावए युँलाई खर्क ज्ञ छैँव माजैव। 10 नो यादोव भरी ते पाखाताव ज्ञयान्या ओन्यार, बारिन्या सोनो हुर्सिद चोखोइसिन्या वाज्र उलिज्ञयाव। नो भरी परमेस्वरए साःरो ओमाजैवा पै वाज्र ओल्यो।

9:2 9:2 प्रस २५:२३-४०; २६:१-३० 9:3 9:3 प्रस २६:३१-३३ 9:4 9:4 प्रस १६:३३;
२५:१०-१६; ३०:१-६; गन्ती १७:८-१०; ब्य १०:३-५ 9:5 9:5 प्रस २५:१८-२२ 9:6
9:6 गन्ती १८:२-३ 9:7 9:7 लेबी १६:२-३४

येसुए स्वर्गताव ओचरैःव पुजा

11खाली ख्रीस हुद नो साःरोल प्रधान पुजारी ताद आव नामलाव कुइए जैसिउ सेवा दान्या पालल माःक, स्वर्गताव परमेस्वरए ओड़ाक ज़ पसिके। 12 नो प्राइरानी चोखो पोल ओबाक बोकाए उझीनी ब माःक, बाछाए उझीनी ब माःक, ओल उझीनी ज़ पसिके। भाःकाव प्रधान पुजारीराए माँःती घरी पाला बाव ब मापरिए। ओल ते तखेप ज़ पसिद अजम्बरी जुनी दैन्या येम फैद्यासिक्यो।

13नो पुजारीराए मिँरालाई चोखोइन्याए जूनी बोकाए उझीए, बहरए उझीए, कैताक मार सघासिउ धुलीए नोरालाई छरैद पाखाताव याक्याँ चोखोइद याराएज्याव। 14 होकिन इन ख्रीसए दाद ओयासिउ येनए ते युँलाई ज़ चोखो जैज्याव। ओल ख्रीस ज़ एकमन्या लिज्याव परमेस्वरए उपुरूसनी ओखत माल्यो मार जैसिद गेदोव पापए जूनी परमेस्वरलाई उजिउ ज़ चरैःद्यासिक्यो। हुनी ज़ गेदोज्याव माचाव येननी चोखोइद जींदो परमेस्वरए उयुँलाव मिताव सेवा दान्यार जैसिज्याव। 15 है जैद ख्रीसए डादाडाव बाचानी बिरैवराए यासजा फोःद्यान्याए जूनी उजिउ झाःद ओरायोए परमेस्वरए ओड़ाकाव साःरो बाचानिकाव त्याला ताद ले। ननी ज़ परमेस्वरए थरैद ओराखुलोरालाई ओयाकालाव माखेमन्या बताहा दैन्यार ताज्यार।

16-17किताव तोबो मिँए ओलसकाव लिज्याव भरी ओमासिद ज़ तोबोए उमिनत सर्द ओएकिन, नो ओसरो बाचा ओल ओमासिवा पै नो दैन्या मिँए ओहक माले। उसिउ प्रमान सतैकिन वाज़ नो बाचा पक्का ताज्या। 18 हो मिताव ज़ परमेस्वरए मिँरास मोसानिकाव ओनैव बाचा ब मारए उझीनी वाज़ ओताज्याव। 19 हो बेलाक मोसाए नलाव मिँरालाई परमेस्वरए ओकानुननिकाव पाँ भरी सथैद बोकाए उझी सोनो बाछाए उझील री झाःद भाताए उतुपात घ्यामो

सन पोःद नो झील छिम्द कानुनलाव पोस्तोको सोनो मिँरालाई अइ लिद याछरैक्यो, ²⁰ “आव डाछरैचिज्याव झी परमेस्वरए जेसकाव ओनैव बाचात आछिमकिन उथूसिउ सरस ज़,” है यादोक्यो। ²¹ हो स्यासो ज़ परमेस्वरए ओसेवा दान्या पाल सोनो नलाव जा भरी ब झीए याछरैक्यो। ²² नो कानुननिकाव चलननी चोखो याजैज्याव भरी जाँकोसै झीनी ज़ याचोखोइज्याव। है जैद पापनी चोखोइसिन्याए जूँनी मार मासैःद ज़ ओमाताज्याव।

ख्रीसए दाद ओयासिउ येन पक्का लिज्या

²³ है जैद नो पाललाव भरी स्वर्गताव नकलनी जैसिउ ओतावए नलाव चोखो याजैज्याव भरी जन्तुराए झीनी चोखो ओताज्याव। साचो स्वर्गत ते होकिन झन चाव चाहिज्या। ²⁴ ख्रीस ते स्वर्गताव नकलनी कुइए जैसिउ पोल माःक, गेलाई सखैन्याए जूँनी परमेस्वरए ओड़ाकाव साचो चोखो पोल उपसिउ ची। ²⁵ नो प्रधान पुजारी ते पाललाव प्राइँरानी चोखो पोल सालकाव तखेप उपसिक मारए झी लाँद वाज़ उपसिज्याव। ख्रीसए ते घरी पाला चरैःव मापरिए। ²⁶ घरी पाला ज़ पसिन्या ताकिन आव मानुवा उसिर्जिउ छ्यामकिन घरी पाला सिउ ब परिखेहो। खाली परमेस्वरए ओगोइँव बेलाक ज़ तखेपूत ज़ पाप भरी खेमन्याए जूँनी ओक्याँलाई चरैःन्यात थाँसिहुके। ²⁷ मिँ भरी तखेप सिउ परिज्या। नकिन परमेस्वरए ओड़ाक फाल्सिउ परिरिज्या। ²⁸ हिताव ज़ ख्रीसए मनी कुधुराए यापाप घुर्द्यान्याए जूँनी तखेप ज़ उजिउलाई चरैःक्यो। फरी ब तखेप आव मानुवात सतैसिहुरिज्या, खाली हो पालाक पाप घुर्द्यान्या ते माःक, ओललाई यायुँ थू जैद कींद नैज्यावरलाई ओलस लाँन्याए जूँनी ज़।

10

कानुननिकाव चलनर हुन्या पाँए ओसाँ ज़

¹मोसाए ओकानुननिकाव चलन भरी साचो ओक्याँ माताद छीनीकाव हुन्या पाँए ओसाँ वाज़ ओतावए नो सालकाव एकमून्या याराचरैःजूयाव माररानी नो चरैःजूयावरालाई छैंव माराजैव। ² ननी ज़ परमेस्वरए ओड़ाक छैंवर याताव ताकिन ड़ादाडाव यादोव पापत उथुपुल माताद पापनी सछैंसिन्या मार सैःन्या ब रासूखेरहो। ³ खाली नो मारर सालकाव याराचरैःजूयावनी इन ज़ यापापए याका दोजूयार। ⁴ काराव ल्यो ताकिन नो बहरर सोनो बोकाराए याझीनी खर्क ज़ मिँलाई पापनी छैंव माजैधुव।

परमेस्वरए ड़ादाडाव बाचालाई तुपैक्यो

⁵है जैद ख्रीस आव संसारल मिँ मिन्सिद उहुक ओल उजूनी धर्मसास्त्रलाव सर्सिउ पाँ ज़ पाँके। नो पाँ आव ज़,

“अ डाबाबु परमेस्वर,

नँलाई मारर सैःद चरैःन्यानी नयुँ होलाँ माताए।

बुरू ड़ालाई मिँ ज़ नजैनाके।

⁶मैःनी सघान्या पुजानी सोनो पाप क्यालून्या पुजानी नयुँ होलाँ माताए।

⁷है जैद अ परमेस्वर,

किताव ड़ाजूनी ड़ादा ज़ धर्मसास्त्रल सर्द ननैजूयाव

हिताव ज़ नयुँलाव मिताव येन दाना डा हुद ड़ाले।”

⁸कानुन मितावनी चरैःन्यार उलिदी ब, ख्रीसए उसकत, “चरैःन्या माररानी, मैःनी सघान्या पुजानी सोनो पाप क्यालून्या पुजानी नयुँ होलाँ माताए,” है लिद, ⁹ फरी, “नयुँलाव मिताव येन दाना डा हुद ड़ाले,” है ब दोक्यो। ननी ज़ परमेस्वरए ड़ादाडावलाई तुपैद छीनीकावलाई थरैक्यो। ¹⁰ परमेस्वरए उयुँ छीनीकावनी ओतावए

गेजूनी येसु ख्रीसए तखेपूत ज़ उज्जिउ चरैःद ओयासिउनी ज़ गे परमेस्वरए ओझाक उयुंलाव मिताव छैवर ताद गेले।

11नो कानुननिकाव पुजारीर परमेस्वरए ओसेवा यादोक एकमून्या तोबो नास्याकाव पुजार वाज़ यादोज़याव। ननी सुलाई ज़ पापनी छैव माराजैर। 12 ख्रीसए ते मिँराए यापापए जूनी ओक्याँलाई तखेपूत ज़ एकमून्याकावए जूनी चरैःद, परमेस्वरए ओवोर्दा चुसिनाके।

13 हाःकिन उसुतुर भरिलाई परमेस्वरए उखँ धूँल झाःद ओमाएवा पै नक ज़ कींद नैव, 14 काराव ल्यो ताकिन ख्रीसए तोबो मारनी ज़ छैव तानाजूयावरलाई एकमून्याकावए जूनी याखत माल्योर याजैक्यो।

15 ख्रीसए निताव येन ओदौव गेलाई छैव पुरूसनी धर्मसासूत्रल ब सतैसिउ लिज्या। नलाव सर्सिउ आव ज़,

16 परमेस्वरए है लिज्या,

“छीनी तछा नोरास इताव साःरो बाचा डानैरिज्या,

डाकानुन यायुँल झाःद्याद, डापाँर यायुँल सर्द डाराएरिज्या।”

17 सोनो,

“यादोव पापर फरी याका ज़ दान्या डामाले।”

18 है जैद गेपाप भरी परमेस्वरए तोबो मारत ज़ खेम्द ओयासिउ प्राइँना फरी छुत मार काराव ओचाहिउ?

साःरो येम फैसिउ

19 गेनै गेमेँर, येसुए उज्जिउ झाःद उझी सोभोद ओयासिउनी परमेस्वरए ओझाकाव प्राइँरानी चोखो पोल पसिन्या गेलाई काताए ओछ्यास ब माले। 20 नो डादाडाव बारिसिउ पोल पसिन्या साःरो येम फैसिउ लिज्या। नो येम येसु उसिउनी ज़ फैद नैद्यासिउ।

21 परमेस्वरए उझिम चलैन्या नाःल्दिउ गेपुजारी उलिज्यावए,

22 गेयुँ सुहुपूद माचाव येनर रासूद गेयुँ चोखो जैद उमिनत रील

सछैसिद धुक्कस परमेस्वरए ल्योदा गेबाया। 23 गेयुं हुपद कींद गेनेजूयाव आस ओमायोवा पै ग्याल गिल माताद थरैद ल्यो ताके। गेलाई ओयाका याजूयावए सत माहारिउ। 24 बुरू कातानी गे गेल खैद समारिसिन्या सोनो चाव येन दान्यात जांगर हाइसिन्या खिमो ताके। 25 गेनी ख्वाराए परमेस्वरए उमिनत दुप्सिन्या यारासो मिताव गे ते दुप्सिन्या खर्क ज़ मारासो ताके। बुरू ख्रीस उहुन्या छ्याम नजिक नजिक उहुनावए झन ज़ गे गेल सा हाइसिउ ताके।

सा:रो येमलाई रासूद गेबाकिन ओछ्यास लिजूया

26गे परमेस्वरए ओपाँ थरैद मनी सैजूयावत सैजूयावत पाप गेदोकिन परमेस्वरस खैन्या येम कातानी गेदैरिजूयाव? 27 बुरू परमेस्वरए उसुतुरालाई जैद ओरायो छे छे डम्सिउ उरिसलाव में:ल बान्या आस वाज़ लिजूया। 28 भा:काव मिर ब मोसाए ओकानुन रासूद तँदा याबाकिन नोराए याउपत नेब्लो सोम्लो साचीर यापुलुस्किन नोरालाई मासै:द यामारासूजूयाव। 29 नोकिन झन जोए परमेस्वरए ओज़ालाई उखँ धूँलाव हिला तकल जैजूयाव, होए झन किताव सजा दैवके? नितावए उजिउ झा:द उझी सोभोद परमेस्वरए ओड़ाक छैव जैजूयावलाई माछैव जैक्यो। उयुं यालूजूयाव छैव पुरूसलाई मनी बीजूयात ज़ जैक्यो। 30 गे ज़ गेसैजूया, परमेस्वरए, “निताव पोल खिस फेरैजूयाव डा ज़,” है लिद ले। सोनो उमीरालाई फालूजूयाव ओल ज़ लिजूया लिन्या ब गेसैजूया। 31 इताव सजारानी जींदो परमेस्वरए उकुइत परिन्या बनै छे छे डम्सिउ लिजूया।

परमेस्वरए ओयेन दान्यात युं सज़िमन्या मा:क

32परमेस्वरए ओपाँ उसकताव जेदैव बेला चेतैच्यो। हो बेलाक परमेस्वरए ओपाँ चावस थरैद कुधु दुखर जेसहिके। 33 ख्वार

प्राइंराए झ़ाक हसैद बरेःसी निन्ऱ्या ब जेताके। ख्वार प्रोसी निन्ऱ्या ब जेताके। ख्वाराए फरी माछेःद नितावरालाई धुरिद्यान्या ब जेताके। ³⁴ झ्यालखानाल परिउरालाई ब चावस ज़ जेराचिऊके। कैताक यालुतिचिक ब 'आवकिन झन चाव खर्क ज़ माखेम्न्या गेधन सम्पती स्वर्गत लिज़्या' लिद रेंद ज़ जेसहिके। ³⁵ है जैद जेयुं तासज़िम्च्यो। नो येननी घ्योःव बाजी जेदैरिज़्या। ³⁶ जेलाई सहिद थंरिन्ऱ्या युँए ओचाहित लिज़्या। निताव युँ जेस उलिकिन परमेस्वरए उयुंलाव मिताव सयोःद ओय़ाकालाव पाँर जेदैरिज़्या। ³⁷ धर्मसास्त्रल इताव सर्सिउ लिज़्या,
“चाँदो ज़ डाहुरिज़्या है लिज़्याव परमेस्वर
धिलो मादाद हतपत ज़ हरिज़्या।

³⁸हो छचाम उयुं हुपद परमेस्वरस खैव मिं वाज़ बाँचिन्ऱ्या ले। ओल्योनी याछींदा ओल्द बाज़्यावर ते उयुंलाव मितावर मातार।”
³⁹खाली गे ते नो ओल्योनी ओल्द नास तान्याल बाज़्याव स्यासोर ते गेमाले, गे ते गेयुं सुहुपद परमेस्वरए ल्योडाव अजम्बरी जुनील बाज़्यावर ची।

11

युँ हुपन्ऱ्या

¹उयुं हुबो मिँए परमेस्वरए ओय़ाकार साचो ज़ थरैद ओमारँःवलाई ब उरँःधुव मिताव ज़ जैज़्याव। ² भाःकाव मिँर ब यायुं उहुबोनी ज़ परमेस्वरए उयुंलावर ताकेर।

³परमेस्वरए ओपाँत गेयुं उहुबोनी ज़ 'परमेस्वरए ओयोःनी नाम नम ओजैव' लिन्ऱ्या गेथरैज़्या। है जैद ताव भरी गेमारँःवनी ज़ ताकेर।

⁴ युँ हुबोनी ज़ हाबिलए ओदाज्यु कयिनकिन परमेस्वरलाई चाव चरैःक्यो। उयुं उहुबोनी ज़ धर्मी थंरिके। ओसाची परमेस्वरलाई

ओचरैःव रैद ओयोनी ज़ रैःजूया। नो ओल उसिदी ब ओयेन ते मासिए, पाँव ज़ लिजूया।

5फरी युँ हुबोनी ज़ हनोक पाला मासिद ज़ स्वर्गत छीसिके। नोलाई परमेस्वरए ओलस ज़ ओलाँवए सापूद ब मादैकेर। नो मिँ परमेस्वरए ओलस ओमालाँद ज़ उयुँलाव मिताव थरिउ उलिजूयाव धर्मसासूत्रल ब रैःजूया। 6 उयुँ माहुपूजूयाव मिँए खर्क ज़ परमेस्वरए उयुँ होलाँ जैद माएधुव। जो परमेस्वरए ल्योदा हुजूया, होए ड़ादा 'परमेस्वर लिजूया ज़' लिद पतिउ ताके, नकिन 'ओललाई खिमूजूयाव मिँए ल्योदा उयुँ यालो ज़ लिजूया' लिन्या ब पतिउ ताके।

7युँ हुबोनी ज़ नोआए पाला हुन्या पाँर ओमाहुद ज़ परमेस्वरए है ओदोव उयुँ हुपूद उज़िमलावरालाई बाँचैन्याए जूनी ड़ादाकिन ज़ री जहाज जैक्यो। ननी ज़ मानुवाताव मिँ भरी ओपोःस ज़ अधर्मीर रैःकेर। ओल ते उयुँ उहुबोनी ज़ परमेस्वरए उयुँलाव मितावल गनिसिके।

8परमेस्वरए अब्राहामलाई याव ओपैजूयाव पोदा उखुल्क उयुँ उहुबोनी ज़ नो पो मासैद ज़ परमेस्वरए ओपाँ भैःद पुलुसूद बाके। 9 नो पो ओल उजिउ भरिल ओमादैदी ब परमेस्वरए ओपाँत उयुँ उहुबोए नल ज़ खासिद लिके। ओज़ा इसहाक, ओनाती याकूबए ओपालाक पै नो पोल ज़ पालल खासिद लिकेर। नोनी ब अब्राहामए ओदैव याका दैवनी निल्यो। 10 ओल अब्राहामए उखिमूजूयाव ते आव मानुवाताव सहररालाई माःक, परमेस्वरए ओजैव खर्क ज़ माखेमून्या सहरलाई ची।

11ओजूया साराए मनी उयुँ उहुबोनी ज़ जूचासूद ब परमेस्वरए ओसक्ती दैद ज़ा तोबो दैक्यो। नो ज़ा दैन्या याका याजूयाव

परमेस्वरलाई ड़ादा ज़ थरैद ओनैज़याव। ¹² है जैद अब्राहाम बनै सेर्द फ्याःन्याल गनिसिउ उलिदी ब ओथोर नमताव सोरोर, सोनो समुन्द्रलाव बालुवा स्यासो मागनिसिधुन्यार ताकेर।

यायुँ हुबोराए स्वर्गताव पो खिमज़्यार

¹³आवर परमेस्वरए ओरायो याका याजिउत यामादैदी ब यायुँ हुपुद ज़ सिकेर। नो याका तादानी ज़ यारँःव मिताव जैद यायुँ नदा ज़ झाःकेर। नोर आव जुनील याझिम मालिद खासिद यालिज़याव मिताव जैसिकेर। ¹⁴निताव जैसिज़यावर साचो यादेस याखिमज़याव रँःज़या। ¹⁵निताव यामाताकिन याख्यानैव देसलाई मामेंःद ओल्द बाखेरहो। ¹⁶खाली आवराए ते या याख्यानैव देसकिन झन स्वर्गताव चाव देस खिमो ज़ यानैज़याव। है जैद परमेस्वरए, “डा आवराए यापरमेस्वर ज़” है लिन्यात ओलाज माहुड, काराव ल्यो ताकिन नोराए जूनी परमेस्वरए स्वर्गत तोबो सहर जैद नैद यायो।

गेपुर्खाराए यायुँ यासुहुबो

¹⁷युँ हुबोनी ज़ अब्राहामए ब परमेस्वरनी ओजाँचिसिक ओज़ा इसहाकलाई चरैःन्यात उयुँ माकैक्यो। परमेस्वरए ओयाकार दैद ओनैज़यावत ब तोबोका तोबो ओज़ालाई परमेस्वरलाई चरैःन्या तयार ज़ ताके। ¹⁸नो ओज़ालाई ज़ परमेस्वरए, “इसहाकनिकावर वाज़ नथोल गनिसिन्या लेर,” है ओदोव। ¹⁹है जैद अब्राहामए उयुँल उयुँल, ‘इसहाक उसिदी ब परमेस्वरए जुनी ब सोचोइवा ज़’ है उलिज़याव। है जैद हो छचाम ओचरैःक ओमासिउए परमेस्वरए सोचोइद ओयो मिताव ज़ ताके।

²⁰युँ हुबोनी ज़ इसहाकए छीनीकाव तान्या पाँराए जूनी ओज़ा याकूब सोनो एसावनिलाई असिक निएक्यो।

11:11 11:11 उत १८:११-१४; २१:२ 11:12 11:12 उत १५:५; २२:१७; ३२:१२

11:13 11:13 उत २३:४; १ इति २९:१५; भज ३९:१२ 11:17 11:17 उत २२:१-१४

11:18 11:18 उत २१:१२ 11:20 11:20 उत २७:२७-२९, ३९-४०

21युँ हुबोनी ज़ याकूबए ब उसिन्या बेलाक उझुइ तिकिसिद परमेस्वरलाई पोंखारिद योसेफए ओज़ानिलाई असिक निएक्यो।

22युँ हुबोनी ज़ योसेफए ब उसिन्या बेलाक इस्राएलीर इजिपनी पुलुसन्याए जूनी पाँद, “आनी जेपुलुस्क आव पोल डारूस ब ख्यानैद तायॉच्यो,” लिद किर्या झाःव यापरीक्यो।

23युँ हुबोनी ज़ मोसा उजर्मिक ओबाबु ओआमानी ‘आव परमेस्वरए उयुँलाव मिताव तारिज़्या’ लिद राजाए ओकानुन रँःद माछेःद ज़ सोमैना पै मोँद नैकिनी।

24युँ हुबोनी ज़ मोसा सेर ओतावत राजा फारोए मेंमा ओज़ाए ओज़ाल उगनिसिदी ब नल ल्यो माभैःके। 25 नोए थॉतस लिद पाप दाज़्याव देखा बुरू परमेस्वरए उमीरास दुख सहिन्या रूजिक्यो। 26 इजिप भरिलाव धन सम्पती उकुइत उलिज़्यावत ब नोकिन इन ख्रीसए उमिनताव हेलारी तान्या घेप्पा रँःक्यो। परमेस्वरए ल्योडाव ओबताहादा वाज़ उयुँ थू जैक्यो। 27 युँ हुबोनी ज़ नलाव राजाए उरिसनी माछेःद इजिपलाई रासूद इस्राएलीराए याडात बाके। सुए ज़ यामारँःधुज़्याव परमेस्वरलाई उरँःव मिताव जैद उयुँ थू जैद नो ओयेनलाई मारास्क्यो। 28 परमेस्वरए इजिपलाव जेथा जेथा भरी ओरासैःज़्याक मोसाए उयुँ उहुबोनी ज़ इस्राएलीराए याज़ार छुव मायान्याए जूनी पाथा सैःद यामत उझी थीन्या निस्तार पबर्ब मानिउ यापरीक्यो।

29युँ हुबोनी ज़ इस्राएलीर लाल समुन्द्र यातरिज़्याक री साःद बगर ताके। नोरालाई खेपैहुव इजिपीर ते नो साःव बगरल याहुव प्राइँना री हुद यागदैक्यो।

30युँ हुबोनी ज़ इस्राएलीराए यरीहो सहरलाई बारिसिउ भार्नालाई

11:21 11:21 उत ४७:३१-४८:२० 11:22 11:22 उत ५०:२४-२५; प्रस १३:१९

11:23 11:23 प्रस १:२२; २:२ 11:24 11:24 प्रस २:१०-१२ 11:27 11:27 प्रस

२:१५ 11:28 11:28 प्रस १२:२१-३० 11:29 11:29 प्रस १४:२१-३१

सात दिन पै दिनकाव तखेप याघुमैक नो भानार यानी ज़ ताकेर।

31युं हुबोनी ज़ नो राहाब बेस्याए ब नो इस्राएलीराए यारापरीव देस जाँचिना हुवनिलाई पाथस उनिनैवए नो सहरलाव मिं भरी यारासैःक ओल सिउ मापरिके।

यायुं हुबोनी ज़ येन ब दोकेर, दुख ब सहिकेर

32इताव यायुं हुबोराए जूनी खा ची डापाँके? नोरानी गिदोन, बाराक, सिमसोन, यिप्ता, दाऊद राजा, समूएल सोनो अगमबत्तार ब लिज़यार। नोराए जूनी सर्न्या समय ज़ माले। 33 युं हुबोनी ज़ नोराए छुत राजयार ब झेंःद यारारैकेर, परमेस्वरए उयुंलाव मिताव येन ब दोकेर, परमेस्वरए ओयाकालाव पाँर ब दैकेर, लाराए यायाःर ब सूइद याराएकेर, 34 वीं वीं चाँःज़्याव मेंःए मुल्कालाई ब सैःकेर, तरवालीनी सिन्यानी ब पुलुस्केर, यासा ओमालिदी ब ओचाहिउ बेलाक घ्योःव सक्ती ब दैकेर, लरैल यासा ल्यो ताद छुत फौजीरालाई याराखेपैकेर, 35 मेंमाराए ब सिउनी सैसिउ यामीरालाई यारादैकेर।

युं हुबोनी ज़ फरी ख्वाराए इयालखानाल यालिज़याक 'परमेस्वरलाई जेरास्किन आनी पुलुसो जेदैया' है यारादोक परमेस्वरए ल्योडाव अजम्बरी जुनी दैन्याए जूनी ननी पुलुसो माभेंःद बुरू दुखस सिन्या सहिकेर। 36 ख्वार फरी हसैसी निन्या, रीःसी निन्या ब ताकेर, ख्वार किसी निन्या ब ताकेर। 37 ख्वारालाई लुंराए झेःद यारासैःकेर, ख्वारालाई करौंतीए चिराःद यारासैःकेर, ख्वारालाई तरवालीए यारासैःकेर। इतावनी ज़ प्राइंनी जाँचिसिकेर। याखिरी पसिद दुखर दैकेर। नोर काता ज़ माल्योर ताद बेधा बाकराराए

11:30 11:30 यहो ६:१२-२१ 11:31 11:31 यहो २:१-२१; ६:२२-२५ 11:32 11:32 न्याय ४:६-५:३१; ६:११-८:३२; ११:१-१२:७; १३:२-१६:३१; १ समू १:१-२५:१; १ समू १६:१-१ राज २:११ 11:33 11:33 दान ६:१-२७ 11:34 11:34 दान ३:१-३० 11:35 11:35 १ राज १७:१७-२४; २ राज ४:२५-३७ 11:36 11:36 १ राज २२:२६-२७; २ इति १८:२५-२६; यर २०:२; ३७:१५; ३८:६

स्यालोर क्वाइसिद दुलिरिन्या ब ताकेर। ³⁸ सु ज़ यामालिज़्याव हाँ जीदा दुलिद कुँ जील पुप जील यालिज़्याव। आव मानुवाताव मिँराए कान्ल ज़ यामारागनिदी ब नोर झन प्राइँरानी घेप्पाल गनिसिउर यालिज़्याव।

³⁹ आव भरी यायुँ उहुबोनी ज़ परमेस्वरए उयुँलाव मितावर ताकेर। खाली आव याजिउत परमेस्वरए ओय़ाकार रँःव मादैकेर।

⁴⁰ काराव ल्यो ताकिन परमेस्वरए गेजूनी झन चाव पाँ तोबो थरैद, 'प्राइँ मिँर तखेपत ज़ छैवर घतारक' लिद गेलाई ब कींद ओनैसिज़्याव।

12

हार मामानिद यादा ज़ बान्या

¹ है जैद यायुँ हुपज़्यावर नाः माहोल्या गेड़ाताव साचीर यातावए गे ब तन्धरे जैज़्याव पाँर सोनो झुकैद पापल पारैज़्याव पाँर रासद थरिद आव जिउत ज़ दुखर सहिद परमेस्वरए ल्योदा बान्या येमदा आस दाद गेधोःना। ² गेयुँ सुहुप्याद अजम्बरी जुनी दैन्या जैज़्याव येसुलाई चिऊद नैव ताके। नोए बीज्यातर तादी ब, क्रुसत तङ्गैसिद सिन्या तादी ब, स्वर्गताव युँ होलाँ तान्या पोलाई उरँःवए नो भरी सहिक्यो। आख ते परमेस्वरए उसिँहासनए ओवोर्दा चुसिद ले। ³ जे जेर्सा सैःद जेयुँ मासतेन्याए जूनी निताव पापीराए ल्योनी मासहिसिधुन्या दुखर सहिउ येसुलाई याका दोच्यो।

गेदुखराल परमेस्वरए मुइलिउ जैसिज़्याव

⁴ जे आःपै पापीराए ल्योनिकाव सिन्या मिताव दुखर जेमादैताए।

⁵ परमेस्वरए जेलाई ओज़ा मितावर जैद ओसम्जैचिउ पाँर तामेंःच्यो। नो पाँ आव ज़,

“अ डाज़ा, ‘परमेस्वरए ओदईनिक दुख ताके’ लिद राँता ब ताजैसिनी, नयुँ ब ताकेःयो।

६जोए ल्योदा परमेस्वरए उयुं ताजूया, होलाई मुइलिउ जैजूयाव।

जोलाई ओजा जैजूयाव, होलाई कैताक रीःजूयाव।”

७जेलाई मुइलिउ जैन्याए जूनी दुखर ब जेदैजूया। परमेस्वरए किताव ओबाबुए ओजालाई ओजैजूयाव, हिताव ज़ जैचिजूयाव। ओबाबुए ओमामःलैव ज़ा सु ची उलिजूयावदा? ८परमेस्वरए जेलाई ओजाराए माँःती जैद ओमामःलैचिउ ताकिन ओजाल मागनिसिद नामर्याल गनिसिन्या जेल्यो। ९ फरी आव मानुवाताव गेबाबुराए मुइलिउ याजैसिउए यामान नैद गेराएजूया। होकिन इन स्वर्गताव गेबाबुए उधूँल ल्यो ताके। ननी ज़ मासिन्या जुनी दैन्या गेले। १० आव मानुवाताव गेबाबुराए ते छ्यावाए जूनी जो पैजूयार, हो येनत मुइलिउ जैसिजूयार। परमेस्वर गेबाबुए ते गे गेजूनी ज़ छैँव ओगेर यान्याए जूनी मुइलिउ जैसिजूयाव। ११ आव मुइलिउ जैजूयाव भरिए उसंकत सुख माताए दुख ज़ ताजूया। खाली छीनी नोर सहिद मुइलिउ ताव मिरालाई परमेस्वरए युँ होलाँ ब जैद्याव दोजूयाव, उयुंलाव मिताव ब जैव दोजूयाव।

१२हे जैद सेलोलो सिउ जेखँ जेकुइर थंरिउ जैचिके। १३ प्राइँए थंरिउ युँ जैद साचो येमनी वाज़ बाच्यो। हो ताकिन ची धो धो बाजूयावर ब मापर्दपद चावस बान्या लेर।

परमेस्वरनिकाव असिक माचुकैन्या

१४प्राइँस खैन्या खिमच्यो। परमेस्वरए उयुंलाव मिताव छैँव तान्या खिमच्यो। माछैँवराए सुए ज़ परमेस्वरलाई रँःधुन्या मालेर। १५ जेनी परमेस्वरनिकाव असिक सुए ज़ ताचुकैच्यो। जेखाल युँल दाद नैन्या सु ज़ ताताक, मानी खादरलाव चिउ भतानुजी मिताव ताद कुधुलाई बलेन्या जेले। १६ एसाव युँ मानैधुन्यानी अधर्मी ओताव मिताव ब सु ज़ तातारक। नोए तकेजा जूयावए जूनी

परमेस्वरनिकाव ओदैव ओजेथाक ब योःक्यो। 17 जे ज़ जेसैज्या, छीनी ओबाबु उसिन्या बेलाक जेथाकलाव असिक फरी उनिक मादैक्यो। बनै घर्द धामा दाद ब मासोवोल्धुक्यो।

जेहुव पो परमेस्वरए ओझाकाव पो ज़

18जे जेहुव पो इस्राएलीर सीनै खागरताव याहुव पो स्यासो ते माःक। नोराए नत घेप्पा मेःए मुल्का, अन्धनी दुन्ध चुम चुमो, बनै घ्योःव लापा रँःकेर। 19 हाःत ज़ नमत भोंकरए ओर्गा थैद नमतिन हुव अचम्बलाव पाँ याथैक नोर बनै छेःद “परमेस्वर फरी गेस तापाँक,” लिद मोसास बिन्ती दोकेर। 20 परमेस्वरए नोरालाई, “आव खागरत सुए ज़ छाप्न्या माताए। छाप्किन, जै जन्तु तादी ब, लुँए झेःद सैःव ज़ परिके,” है ओरादोक नोर याछ्याचेए मासहिधुकेर। 21 बनै छे छे डमसिउ ओतावए मोसाए पाला, “डा ब डाछ्याचेए डागूज्या,” है लिके।

22खाली जे ते निताव पोत जेहुव माःक। जे जेहुव पो ते झन स्वर्गताव सियोन दाँदाताव जीदो परमेस्वर उलिज्याव यरूसलेम सहरल हुद जेले। नल मागनिसिधुन्या परमेस्वरए ओचाकर्यार बनै रेंद ओसेवा दोज्यावर लिज्यार। 23 परमेस्वरए ओज़ाल गनिसिउ, स्वर्गत यामिन सर्सिउ भरी ब लिज्यार, परमेस्वरए उयुँलाव मिताव धर्मी मिँराए यापुरूसर ब लिज्यार, प्राइँलाई फाल्ज्याव परमेस्वर ब लिज्या। 24 साःरो बाचानिकाव गेत्याला येसु ब लिज्या। नोए उजिउ झाःद ओयासिउनी गेलाई परमेस्वरस सखैसिज्याव। ओल उसिउ ते हाबिल उसिउ मितावनी माःक। हाबिल मितावनी सिन्या ते खिस फेरिन्या वाज़, येसु उसिउनी ते सखैन्या दोज्याव।

परमेस्वरए ओपाँकिन तँदा गेबाकिन ओछ्यास लिज्या

25जे जोगोइसिद लिच्यो, मानी नो सखैज्यावए ओपाँ माभैःज्याव मितार जे ब तान्या ओछ्यास लिज्या। आव मानुवात परमेस्वरए ओपाँ थैव यामाभैःवनी उस्किउ यामादैकिन, गे ज्ञान स्वर्गनी पाँज्यावए ओपाँ गेमाभैःकिन कातानी उस्किउ गेदैरिज्याव? 26 झादा सीनै खागरत परमेस्वरए ओर्गाए आव नामलाई थोनोःक्यो। होए उछीनी फरी अइ लिद य़ाका नैक्यो, “फरी तछा तखेप डाथोनोःरिज्या, आव नामलाई वाज़ माःक, नमलाई ब डाथोनोःरिज्या।”

27नो “फरी तखेप डाथोनोःरिज्या” है उलिज्यावए ओअर्थ आव ज़ — ओराजैव भरी ओपोःस ज़ तछा याखेमरिज्याव। हो ताकिन ची माथोनोःसिधुन्यार वाज़ रहिरिज्यार।

28है जैद खर्क ज़ माथोनोःसिधुन्या थोरिउ ओराज्या ओयासिरिज्यावए गे परमेस्वरए उगुन मानिद ओललाई ओज्यासज्याव मितार ओमानर नैद्याद छैव युँस ओसेवा दाव ताके। 29 काराव ल्यो ताकिन गे गेपरमेस्वर च्याप ख्याज्याव मेंः स्यासो लिज्या।

13

परमेस्वरए ओपैज्याव येनर

1जे नै मेंस खैन्या येन मारासूद दाव ज़ नैच्यो। 2 जेझिमक हुवलाई खर्क ज़ मासरेससिउ तादी ब चावस नैच्यो। ख्वा ख्वाराए नितारानी ज़ परमेस्वरए ओचाकर्यारालाई ब मासरेसूद ज़ यारानैकेर। 3 इयालखानाल लिज्यावरालाई जे ब नोरास सिप जेलिज्याव मितार चेतैद याराचिऊच्यो। दुख दैज्यावरालाई ब हितावनी ज़ याराचिऊच्यो।

4ज्या जेरैक, रे जेदोक, ज्या-री सतत लिन्या ओताक, असत दान्या ताताक। छुतए ओज्यास बाज्यावर छुतए ओरेस बाज्यावर सोनो

पातर्या पातर्नी जैसिज्यावर परमेस्वरए ओसजाल परिन्या लेर।
 5 धन सम्पतीए लोभनी अछतड लिच्यो। जेस खा उलिज्याव हाःत
 ज्ञ सोन्तोकोस लिच्यो। परमेस्वरए ओल ज्ञ है लिज्या,
 “डा जेलाई खर्क ज्ञ रास्न्या डामाले,
 ख्यानैन्या ब डामाले।”

6 है जैद गे धुक्क ताद ज्ञ है गेलिज्या,
 “गेप्रभुए प्राइल ज्ञ ओसघैसिज्यावए कातानी ब छेःन्या गेमाले।
 मिंराए गेलाई कै ची याजैसिधुरिज्याव?”

7 जेलाई परमेस्वरए ओपाँ सथैद जेडात बाज्यावरलाई याराचिऊचिके।
 नोराए यायेननी आः चाव ओताज्याव ओल्यो लिन्या चेतैद जे ब
 नोराए माँःती जेयुँ सुहुपच्यो।

परमेस्वरए ओपैज्याव पुजा

8 येसु स्त्रीस खर्क ज्ञ मातोसिए, डादा किताव ओल्यो आज्याल ब
 हिताव ज्ञ लिज्या। 9 है जैद भाँती भाँतिलाव छुतनी यारापैज्याव
 पाँरादा ताबाच्यो। परमेस्वरलाई चरैःद ज्ञान्या ज्ञ्यावए गेयुँलाई
 छैव माजैव, ननी ओफाइदा ज्ञ माले। युँलाई छैव जैज्याव ते
 परमेस्वरए उयुँ गराँद दाद ओयासिउनी वाज्ज ताज्या।

10 गेस तोबो थान लिज्या। नो थानताव चरैःसिउ पाथा परमेस्वरए
 ओसेवा दोज्याव पुजारीराए ब कैःन्या माताए। 11 कानुननी ब
 प्रधान पुजारीए पाथाए उझी लाँद पाललाव प्राइँरानी चोखो पोल
 पसिद मिंराए यापापए जूँनी नो झी चरैःद ओराएज्याव। नो पाथाए
 ओक्याँलाई ते सहरकिन पाखाड लाँद यासघाज्याव। 12 हिताव
 ज्ञ येसुए मनी उझी सोभोद गे मिंरालाई गेपापनी रासुद परमेस्वरस
 सखैन्याए जूँनी सहरकिन पाखाड उजिउ चरैःद्यासिक्यो। 13 है जैद गे
 मनी सहरकिन पाखाड ओल्योदा बाद ओल ओदैव मिताव बीज्यात

सहिउ ताके, ¹⁴ काराव ल्यो ताकिन गे आव मानुवाताव जाँवा पै वाज्र खासिद गेलिज्याव पोकिन एकतार लिन्या पो खिमन्या लिज्या।

¹⁵है जैद येसुए दाद ओयासिउए परमेस्वरए उमिन सघ्योःद्याद एकमन्या धन्याबाद गेचरैःया। नो चरैःन्या आव ज़ — उगुन मामेंःद उमिन हाइन्या। ¹⁶सोनो छुतलाई समारिन्या, छुतलाई यान्या ब तामेंःच्यो। नितावनी ब परमेस्वरलाई चरैःज्याव मिताव ज़ ताज्या। ननी ज़ परमेस्वर खुसी ताज्या।

¹⁷जेलोम्बाराए याधूँल लिद होराए यापाँ भैंःच्यो। किताव हिसाप दाज्याव मिँए हिसाप सुदुमो परिज्या, हिताव ज़ नोराए ब परमेस्वरए ओबगालरानी 'तोबो ब तामारक' लिद जेलाई बनै धामास चिऊचिज्यार। है जैद नोरालाई यानाल केःद्यान्या येन ताताक, खुसी जैन्या येन ओताक। यानाल केःद जेराएकिन जेलाई काता फाइदा ज़ तान्या माले।

गेजूनी पोंखारिद्यासिच्यो

¹⁸गे गेजूनी ब पोंखारिद्यासिच्यो। गे प्राइँनी ज़ साचो छैंव येन वाज्र दोव गेपैँज्या। आःपै ते गेदोव भरित परमेस्वरए ओडाक गेयुँ छैंव ज़ लिज्या लिद गेयुँ हुबो ज़ लिज्या। ¹⁹खाली डा जेल्योदा चाँदो ज़ हुव डापैँज्या। होए जूँनी जे काचाबुल पोंखारिउ ताके।

जेलाई परमेस्वरए ओअसिक ओताक

²⁰युँ होलाँ जैद्याज्याव परमेस्वरए ज़ बेधाराए चाव यार्गे गावला गेप्रभु येसुलाई सिउनी सोचोइद्यासिक्यो। नो ओजाए उजिउ झाःद उझी सोभोद ओयासिउनी खर्क ज़ माखेमन्या गेत्याला ब जैद्यासिक्यो। ²¹अब ते ओल ओपैँज्याव मिताव येन दान्यात सरजाम जोरैद ओयाचिउक। ओजा येसु ख्रीसए ओसत्कीनी उयुँलाव मिताव ब ओजैचिउक। ओललाई खर्क ज़ माखेमन्या ज़गै मगैव ज़

ओताक। आमेन।

तुपैन्या पाँर

22अ डानैँ डामेँर, जेलाई सा हाइन्या पाँ छया वाज़ सर्द नैद डायचिए। जे आव पाँत ज़ धिद लिच्यो लिद डाबिन्ती लिज्या।

23 आःपै जेमासैँताखेहो, गेभाइ तिमोथीलाई इयालखानानी रासूद नैर। नो आल चाँदो उहुकिन, डा नोस तखेप डाहुरिज्या।

24 जेलोम्बार सोनो परमेस्वरए छैँव उमीं भरिरालाई जेरो है यारादोच्यो। सोनो इतालियालाव गेनैँ गेमेँराए ब जेरो है दाचिज्यार।

25 जेल्योदा परमेस्वरए उयुँ ओगराँक। आमेन।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd